

四庫全書

集部

欽定四庫全書

集部

五百家播芳大全文粹卷六十五

六

詳校官侍郎<sub>臣</sub>劉躍雲

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>李 奎

謄錄監生<sub>臣</sub>徐紹城

欽定四庫全書

五百家播芳大全文粹卷六十五

宋 魏齊賢

葉 棻同輯

尺牘

與晁美叔帖

蘇子由

自別兩辱存問荷眷契之厚無以為喻日欲裁謝而拙  
鈍懶放因循至今計明哲雅量不深譴過而自訟亦久

矣即日不審尊履何如某此無恙但奉行新政多不如法勘劾相尋日竢汰遣耳若得放歸過淮必遂候見伏惟為國自重謹奉手啟起居不宣

向承出按淮甸不即具賀幅者以吾兄素性亮直而此職多有可愧者計非所樂耳然仁者於此時力行寬大之政少紓吏民于網羅中亦所益不少比中常賦之外徵斂雜出而鹽禁繁密急於兵火民既無告吏亦僅且免罪益苟簡矣向聞吾兄議論頗與時輩不合今茲躬

履其事必有可觀者矣令兄佳士久淹諸君自亦知之

與康叔朝議帖

蘇子瞻

近日隨例紛冗有疎上問不審起居何如兩日來武昌如聞公在告何也豈尊候小不佳乎無由躬謁左右但有馳系冬間身寒淺尤宜慎護謹奉手啟不宣

再辱手教承起居清勝今日風大明日禁江皆當走見適會姪婿後日行來日已約數客酌餞咫尺不得一往愧負深矣所要重寫詩已一依來命別寫去不知中用

否大字寫未及恕察

與呂龍圖帖

蘇子瞻

某西蜀之鄙人幼承家訓長知義方粗識名教遂堅晚節兩登進士一中茂才科故當世名公巨卿亦嘗賜其提挈愛憐之意故歐公引之于其始韓公薦之于其中今又閣下舉之于其後自惟末學辱大賢者之知出自天幸然君子之心以公而取士某小人之志終荷恩以歸心但空省循何由論報比者止於片言隻字謝德于

門下而其誠之所加意有所不能盡意之所至言有所不能宣故其見于筆舌者止此而已惟高明有以容而亮之不宣

前以拙訥上塵聽覽方懼獲罪于門下而無以容其誅又辱荅教言辭款密禮遇優隆而褒揚之句有加于前日此不肖所以且喜且懼而莫知所措珍函已捧受訖謹藏之于家以為子孫之美觀葭屋之陋復生光采陳根之朽再出英華乃閣下暖然之春有以嫗育成就之

故也擇日齋沐再詣閣下臨紙澁訥情不能宣伏惟恕其愚不宣

久以局事汨沒殊不獲覲止竊惟應得疎絕之罪于左右不意寬仁含垢察其俗狀之常情恕其簡畧之小過光降書辭曲加勞問拜貺之際益增厚顏旦夕詣賓次盛暑伏惟為朝廷自愛上副注倚之心下慰輿人之望謹拜啟不宣

與韓昭文帖



遠遼旌榮忽已數月改歲緬想台候勝常邊徼往還從  
者殊勞日望馬首但迂拙動成罪戾恐不能及見公之  
還而去耳餘寒伏冀為國自重因任秘校行謹奉啟叅  
候不宣

與毛澤民帖

公素人來得書累幅既聞起居之詳又獲新詩一篇及  
公素寄示雙石堂記居夷久矣不意復聞韶護之餘音  
喜慰之極無以示諭久廢筆硯不敢繼和必識此意會

合無期臨書悵悵秋暑萬萬以時自厚不宣明守一書  
託為致之育王大覺禪師仁廟所舊過嘗見御筆賜倡  
頌其畧云伏覩大覺禪師其敬之如此今聞其困于小  
人之言幾不安其居可歎可歎太守聰明老成必能安  
全之願公因告款曲一言正使凡僧猶當以仁廟之故  
加禮而況其人道徳文彩推重一時乎此老今年八十  
二若不安全當使何往恐朝廷聞之亦未必喜也某方  
與撰宸奎閣記旦夕附去公若見此老且與致意千萬

千萬

窮居粗淺本帶一幼子來今者長子又授韶州仁化令  
冬中當挈家來此某又已買得數畝地在白鶴峯上古  
白鶴觀基也已令斫木陶瓦作屋二十許間今冬成去  
七十無幾矧未必能至耶更欲何之以此神氣粗定無  
足為故人念者聖主方設科求宏詞公儻有意乎某再  
拜

新居在大江上風雲百變足娛老人也有一書齋名思

無邪齋閑邪之意也

寄示奇茗極精而豐南來未始得也亦時復有山僧逸  
民可與同賞此外但緘而藏之耳佩荷厚意永以為好  
秋興之作追配騷人矣不肖何足以窺其粗遇不遇故  
自有定數然非厄窮無聊何以發此奇思以自表于世  
耶敬佩來貺傳之知音感愧之極數日適苦壅嗽殆不  
可堪強作報滅裂死罪

與蜀帥李元純帖

邑子每來諗聞豈第之政西蜀泰然不肖與受賜多矣  
小侄千之初官得在麾下想蒙教誨成就也魯拜聞眉  
士程遵誨者文詞氣節皆有可取不知魯請見否冗中  
不盡區區

何朔爾後紛紛不獲繼問左右蜀本易治而或者擾之  
公既深識民情而民亦素服公政竊下車以來談笑無  
事行春之樂無由託後乘陪賓客之末但深想望舍第  
鎖宿殿廬未及奉狀

張房助教陵井人本治儒學已而為醫有過人者識病通變而性極厚恐欲知之某寵祿過分碌碌無補以為愧近屢請郡未獲若獲埽墳墓遂得望見豈勝厚幸但恐政成促召在旦暮耳冗中不盡區區

與樞密侍郎帖

蘇子瞻

違去門下已八年愚魯罷殆書疏缺然怠慢之罪宜在譴絕比承柄用又不以時隨衆脩賀益踈懶愧縮日復一日不知復憐恕之否即日履茲寒凝台候萬福某去

替止數月而貧困難以赴闕相次乞浙江一郡若幸得之拜見未可期惟冀為國自重謹因人便奉手狀起居不宣

與滕達道帖

蘇子瞻

罪廢之餘杜門省愆人事殆廢久不脩問亦非怠慢舍弟來具道動止甚詳如獲一見移守安陸日問首耗忽蒙惠書承已到郡具審起居康勝初不知軒旆過黃陂既是州界一走見亦不難此甚可惋歎也云旅寓凡百

粗遣不煩憂念咫尺時得別書亦可幸也苦寒萬乞為  
時自重謹奉手啟上謝不宣

輒有少懇甚屬率易惟寬恕自得罪以來不敢作詩文  
字近有成都僧惟簡者本一族兄甚有道行堅來要作  
經藏碑却之不可遂有變格都作迦語貴無可箋注今  
錄本拜呈欲求公真蹟作十大字以耀碑首況蜀中未  
有公筆蹟亦是一闕若幸賜許真是一段奇事可否竢  
命見有一蜀僧在此旦夕歸去若獲便可付也



闕人寫公狀乞矜恕示諭邸報下京東保明此初不見  
乞錄示可否所問未押字亦不得其詳但云為吳興典  
田千餘緡田主欲賣不許為人所言耳亦不知的否契  
章亦自與之熟羅漢堂雄麗之極或與旁作四字記之  
亦無害但副團御位不稱其意如何如何此書到後乞  
遞中畧示數字貴知達耳

與監宮帖

蘇子瞻

遠枉書教存問甚篤審比來起居佳勝感慰兼集寄示

石刻仰佩至意何時會合少發所懷臨書但有慨然秋  
冷更望以時自重

早歲荷先公深知至熙寧中相見都下得聞其約論所  
以上補君相者非一但人不知耳不然者某豈敢驟以  
一書深言哉近見朝廷推恩賜謚則先公忠誠已自表  
見于後世若此書不出可也然因此以知足下存心如  
此則先公為不忘矣覽之悲喜適會有少冗作書不能  
盡區區非久當別上問也

與鄭運使帖

葉道卿

睽索以來凝想何極郡務繁冗德履康靖自吳郡泊南  
徐并維揚三魯寓簡必冀悉達淨几舟行今日抵泗濱  
皆平善勿憂軫也沿路州縣并偕及兵士相送知幸知  
幸後月半間必至輦下司封雅候無恙應時常相見切  
宜勸勉寬中加愛是禱

與曹士衡殿丞帖

河水相去朝夕可航末由瞻風日以懷吝數賜大牘頗

越常儀裁答既愆震惶無已比奉來教託銘太夫人之  
窆夙眷有素義不敢辭草土之中別無稱目輒欲竊借  
子文屯田名爵以光蕪累不勝大願書石未審屬之何  
人宜擇楷法善者隨石大小以紙先裁白本分布行道  
試寫一通平空之間疎密貴中文字或有未穩早希開  
諭書石或著長洲都官之御甚雅不然陸太丞亦在此  
近者朝旌之來頻枉車馭有慰窮困不任銘哉旋阻風  
德忽逾弦朏相望數舍問信不數冬序增凜想惟神宇

恬暢邑政脩舉民譽播流稽之于前殆無其比甚善甚善想在期月別奉陟恩歲陰天寒深願珍厚

與丘道源帖

刁景純

昨日比期面奉承辭以少勞不敢固辭請辱誨知赴僧藍之期詰朝方得拜見矣示及體仁堂名熟思之其義包括盡矣但慮涉人君所行之事耳如無疑即作一記可敷演其義有所勸矣至如乾明寺前小閣及池上水亭亦為留意冀得佳名以揭之也如有所得幸乞示下

心經序納上樂道謝上表請一觀封示范氏祭儀寫訖  
納上

昨日承臨況小奉高論殊警懣聞幸甚幸甚看親之行  
且緩數日甚善何苦忙也當塗詩牽強也諭及之仲求  
意近有一篇來已和訖方待寄去旦夕面奉以罄區區  
與吳學士帖

蔡君謨

春候和燠不審德履佳否計庭日以繁冗沉迷故於書  
滕寔為曠闕自初至省副使判官遷移不可悉數今特

王公和舊人而已三期之內流轉如此來日畧知案分  
則入置之欲事日脩舉難矣及夏便即解去劇任不可  
以久處也末由展對但極瞻跂

與李觀察帖

昨日蒙手教見招乃素所願然前朝暴暖省中解衣晚  
為風邪所侵至今猶未甚解夜來并服餌明日料可  
出來得且那後時可否惜此春物已闌私心殊不快也

與王學士帖

歐陽永叔

春暄伏惟尊侯萬福某自去年閏月東都祿養幸如所欲惟僻陋日益愚鄙耳在都下時承兄舟行不及攀送其後送者還頗知留客甚歡而飲酒差多親族皆以素羸奉憂不知其後復飲否子野善能攝治猶能絕葷血甘淡薄況於酒也一別頓爾南北關於問候惟冀自重以慰區區

與蔡省副帖

公私忽忽久闕致誠辱教方承已登舟遂不復得一敘



別可勝瞻戀短景日暮還家客已盈室寢食殆廢習以  
為常以此久不奉問慙罪慙罪汝陰君子久處疾少間  
當來歸未見唯寬中自愛審耳藥餌餘不盡區區

與太博帖

罪逆餘生遠屏郊外特承顧訪感咽何窮仍沐寵惠雄  
篇俾遂榮覽雖在哀迷亦知聞警如嘉州清井之作有  
以見仁言之利溥而非文字之空言也欽熟才譽固已  
有日粗窺高蘊益用嘆服以衣制不能謁謝

與吳諫院帖

思奉清論不可得徒用企想夏熱承體氣佳裕某此者  
忽有尹命殊出意外不惟才非所長加以他慮不淺昨  
已懇辭庶可得免如其不獲恐難堅避誌文鄙拙豈足  
當之第以欣慕忠義樂於紀次因得附名于石末遂不  
敢辭爾惶恐惶恐鄙懷區區不能具道

與陸秘書帖

人至辱示長書及古今雜文十軸其研窮六經之旨究

切當世之務與其辨論文詞之際如決壅塞闢通渠以  
寫浩渺之無窮御駟駿而馳騁然則君子之所能與其  
所用心者不待相見而可知矣某哀病廢學多難於時  
常幸得空門之處苟樂於自棄而吾子獨不棄之惠然  
見及何以當之欣慕悚愧聊此為謝

與劉舍人帖

歐陽永叔

適歸自外捧惠佳篇豈勝欣感偶然之會雖草率而縛  
於文字聊為他時故事茲敢不勉也然西齋素患寂寞

近方稍葺而原父去此稍遠此俗所謂事無恰好也承  
置得懷州牛膝更有盡乞之哀病者遂得取濟於茲物  
深所望也漏舍冀得奉見以盡區區

與王學士帖

歐陽永叔

京師區區自朝及夕無益於公私而思接賢者之論亦  
不時得近兩辱見顧皆不獲迎候豈勝悵恨寒陰不審  
氣體何似旦夕當卜至門未間先此為謝冀有以亮之  
而已

與蔡公帖

歐陽永叔

辱惠櫻寧翁墨多荷多荷佳物誠難為得比也人尚少  
其二幽齊隙靜時點弄筆硯殊賴於此雖多無厭也煩  
括計不為嫌矣諸留面叙

與李廬州帖

歐陽永叔

承誨示至於勤勤所寄浮槎水味尤佳然豈減惠山之  
品久居京師絕難得佳山水頓食如比飲甘醴所患遠  
難多致不得厭飲耳此山前世粗有名然皆因僧居以

為勝今所記者特水少故不及其他也張又新水記與陸羽不同考於二家之書可見矣今更錄往時所作大明井記奉呈庶可知其詳也因人入都小鉸時為致一兩器千里致水恐涉好竒之弊然若不勞煩則亦無害更裁之

與李昭玘帖

無便久不奉書王子中來且出所惠書益知動止之詳為慰無量比日尊體何如既拜賜雪堂新詩又獲觀負

日軒詩文耳目眩駭不能測其深淺矣老病廢學已久  
而此心猶在觀足下新製及魯直无咎明畧等諸人唱  
和于拙者便可閣筆不復措詞近有李彥者陽翟人雖  
狂氣未除而筆墨瀾翻已有漂沙走石之勢嘗識之否  
子中殊長進皆左右之賜也何時一笑未間惟萬萬自  
重徐人還忽忽奉啟不宣

與孫運勾帖

蘇子瞻

脾能母養餘臟故養生家謂之黃婆司馬子微著天隱

子獨教人存黃氣入泥丸能致長生太倉公言安穀過期不安穀不及期以此知脾胃完固百疾不生近見江南老人年七十二狀貌氣力如四五十人問其所得初無異術但云平生絕不飲湯水耳常人日飲數升五日減一合今但濡唇而已脾胃惡濕飲少胃強氣盛液行自然不濕雖冒暑遠行亦不念水此可謂至言不繁聞曼叔比得腫疾皆以利水藥去之中年以後一利一哀豈可數乎當及今無病時力養胃氣若土能制水病何



由生向陳彥升云少時得此病服商陸防己之類皆不效服金液丹灸臍下乃愈此亦固胃助陽之意也但火力外物不如江南老人之術耳薑桂辣藥例能脹肺多為腫媒不可服有書告之為佳也

與徐司封帖

蘇子瞻

適辱車騎寵存感忤無窮晚來尊體佳勝某與陳君畧出至安國遂覺拙疾稍作欲告明日少休後日恭與盛集可否無狀慚負多矣謹奉啟布聞不宣

與米獻明帖

蘇子瞻

累日欲上謁竟未果辱教承足疾未安不勝馳企此疾  
惟葳靈仙牛膝二味為末蜜丸空心服必效之藥也但  
葳靈仙難得真者俗醫所用多藁本之細者耳其驗以味  
極苦而色紫黑折之內有微塵起如胡黃連且脆而不  
韌向明視之斷處有黑白暈俗謂之鵠鵠眼此兩者備  
然後為真服之有奇驗腫痛拘攣皆可以有走馬之效  
二物當等分或視葳虛實加減牛膝酒及熱水皆可下

獨忌茶耳犯者不復有效前嘗服此但每歲收槐皂莢  
芽之極嫩者如造茶法貯之以代茗飲此效屢嘗目擊  
知君苦疾謹以奉白元之書不暇作稍空便往見不一

與蘇子容帖

蘇子瞻

久不奉狀疎慢之罪尚蒙寬恕否即日起居佳勝承已  
拜未即大用興議尚鬱然阻勸有法足以潁汗姦諛鼓  
勇忠義當非小補也某蒙此如昨但久不聞談誨僻郡  
親友莫至日以生鄙矣漸冷惟冀為國自重不宣

適見人言宗叔墜馬尋遣人問候門下又知有少損不  
勝憂懸甚不敢便上謁家傳接骨丹極有神驗若未欲  
奉食且用外帖立能止痛生肌正骨也匆匆奉啟不宣  
向來罪譴皆自取今此量移之命已出望外重承示諭  
感愧增劇以久困累重無由陸去見作舟行沂洛夏末  
可到也公所苦想亦不深但庸醫不識故用藥不應耳  
蘄水人龐安時者脈藥皆精博學多識已試之驗不減  
古人度其勢未可邀致然必詳錄得疾之因進退之候

令見形狀使之評論處方亦十得五六可遣人與書庶  
幾有益此人操行高雅不志于利某頗與之熟已與書  
今候公書至即為詳處也更乞裁之仍恕造次

穎師書數紙得之驚喜雛貌奮鬣已降老彪矣冗中未  
及作書勿訝勿訝

與王幼安帖

蘇子瞻

索居八年未嘗一通問每以慚負屢得許下兒侄書云  
比來親族或斷往還唯幼安昆仲待遇加厚聞之感激

人來辱書累幅陳義慨然如接古人語信王謝風氣傳之有自也老朽強答不復成語不罪不罪

某初欲就食宜興今得子由書苦勸歸許昌已決意從之矣舟已至廬山下旦夕當獲過謁未間乞若時保嗇不宣

蒙示諭過重雖愛念如此然憂患之餘未忘憂畏朋友當思有以保全之者過實之譽願為掩諱之也許暫假大第幸甚幸甚非所敢望也得託庇偏廡謹不敢薰污

稍定當求數畝荒隙結茅而老焉若未即溝壑得及見  
昆仲功成而歸為鄉里房舍客伏臘相勞問何樂如之  
餘非面莫究

與鄧承旨帖

蘓子瞻

別來思仰益深到郡即欲上問因循至今辱書教感忤  
無量履茲薄冷台候康勝瞻望咫尺莫由際集尚冀順  
時為人自重

衰病日加得此便郡蕭然乃無一事平生守官未有如

今之適也舊過潁州亦樂土但恐民事不如潁之絕少爾嘯咏之樂陪公者計不負風月餘非面莫究匆匆

與陳君式大夫帖

蘇子瞻

蒙惠竹簾剪刀等仰服眷厚歐陽文忠公云涼竹簾之暑風遂得此味近日尤復省事希出去歲冬至齋居四十九日息念歸根似有所得旦夕復夏至當復閉關却掃古人云化國之日舒以長妄想既絕頽然如葛天氏之民道家所謂延年却老者殆謂此乎若終身汲汲隨



物上下者雖享髦期之壽忽然如白駒之過隙不敢獨享此福輒用分獻想當領納也呵呵

多日不獲請見伏惟尊候康勝借示綉佛奇妙之極當由天工神授非獨尋常女工之精麗者也凡目瞻仰一洗塵障幸矣謹却馳納少暇詣謝次不宣

秋暑尚爾不敢造門伏想起居住佳勝借示丞相手簡及所書彌勒佛偈筆勢峻秀實為奇觀手簡謹却馳納偈必有別本輒留箱篋之珍且欲誦味以洗從來罪垢業

障幸甚旦夕當得造謝也

與王敏仲帖

蘇子瞻

春候清穆竊惟撫馭多暇起居萬福甘雨應期遠邇滋洽助喜慰也某凡百粗遣適遷新居已浹旬日小窻疎籬頗有幽趣賤累亦不久到矣未期瞻奉萬萬為國自重不宣

兩蒙賜教感慰深至曾因周循州行奉狀伏想已塵清覽即日台候何似越人事嬉遊盛于春時高懷俯就想

復與衆同之天色澄穆亦惟此時也莫緣陪後來西望  
增慨尚冀保練慰此區區

與滕興公帖

蘇子瞻

某久當廢逐今荷寬恩尚有民社又聞風土不甚惡遠  
近南北皆無所較幸不深念示諭壇記新以文字獲罪  
未敢秉筆也人來匆遽不盡區區

近晚訪聞一事請貸糧者幾滿城郭多請不得至有住  
數日所費多於所請者吾儕首慮此事非不約束而官

吏惰忽如此蓋失于按刻之故也切請興公速為根究  
為邑官告諭期會不明耶為倉官不早入晚出支遣乖  
方所致邪切與根究取問施行病中聞之甚愧某手啟

與費中行帖

毛澤民

今日聞行李北歸適少事未及見車馬先枉手誨愧感  
之劇霜途千里想亦少勞來日當奉候次

晚來體中安適否鄙文輒自暴其醜者非求致浼于執  
事也譬之餓人操觚以勻于門而公指其腹言蓋已屬

厭矣無乃甚不仁哉幸勿加塗抹便望斥還賤軀微不  
佳恕草率

奉告分以盧橘甚愧食珍晚來起居清安一兩日來病  
軀良不佳阻見長者乃中焦渴

適幸枉車騎移刻尊候清安來早作一飯屈致從人想  
賜臨之矣乍到官紛然吏役之迫諸況不聊以故因循  
未作書敬報諸公無乃得罪左右否某強顏此邦非所  
樂者林泉雞犬相聞日思引去耳數日苦寒疾尚在告

奉狀殊少力以故草率

伏下風有年無從識面得官于此幸聲猷相咫尺然無地得望顏色空懷仰有加耳

使介賜教甚厚下情愧感之劇積雨蕭冷不審訊後眠食佳否某強顏少味無可言者阻遠未有晤語之幸竊冀為人自厚前須休命不宣

前此送迎紛紛數月飯不時飽從人之留固久而乘電相揖耳今以甚恨而不忘奉告喜還治益佳適時澤佳

士每聞談笑實不絕口計詩酒相從無虛日郡中雖多  
賢者無與往還杜門忽忽真檻猿也

平生藁養學文孤陋每應可作俗下文字他日自取讀  
便慚欲走中行以文章自名不應輕許可若是也片言  
隻字多不收拾前此謾錄得數篇便時澤見過出之為  
一笑不謂持去遂污齋閣知謬誤紛紛大須改正願且  
斥還臨行百冗作報滅裂

與俞叔通教授帖

曾子固

辱文采甚盛所以應今之科選者宜無不合而乃爾滯淹此鄙鈍所未喻迫行不得迎接謹奉啟陳謝

謝張文潛帖

蘇子瞻

久別不勝思企公私紛然未暇奉書忽辱手教且審起居佳勝至慰至慰惠示文編三復感歎甚矣君之文似子由也子由之文實勝僕而世俗不知乃以為不如其為人深不願人知之其為文如其為人故汪洋澹泊有一唱三歎之聲其秀傑之氣終不可沒其作黃樓之賦



乃稍自振厲若欲以警發憤憤者而或者便謂僕代作此尤可笑是殆見吾善者機也文字之敝未有如今日者也其源皆出于王氏王氏之文未必不善也其患好使人同已自孔子以來顏淵之仁子路之勇猶不能以相移而王氏乃欲以學同天下地之美固所生而物不同于所生惟荒瘠斥鹵之地彌望皆黃茅白葦此則王氏之所同也近見章子厚言先帝晚年甚患文字之陋欲稍變取士法特未暇耳議者欲漸復詩賦立春秋學

官其論甚美僕老矣彼後生猶得見士大夫之全者正  
賴黃魯直秦少游晁无咎黃傳道與君等數輩耳如聞  
君當作大學博士願益勉之德輶如毛民鮮克舉之我  
儀圖之愛莫助之此外千萬保愛

五百家播芳大全文粹卷六十五

欽定四庫全書

五百家播芳大全文粹卷六十六

宋 魏齊賢

葉 棻同輯

尺牘

與孫舍人帖

唐子方

昨離上黨因便使拜狀諒呈几格介初三日到國門以  
淮南舟航未至汴流淺涸寄寓僧舍今得朝旨見須却

暫般入城京師大暑久在河東地涼乍此奔走不勝其  
勞矣恭惟日來臨撫之暇起居冲適未緣奉見更乞順  
時為國自重下情區區謹奉手啟

與吳殿院帖

楊公濟

嚮以嫌避稍疎祇詣然傾慕之意則深矣戇川之行大  
鬱輿論臺閣風采自茲益新不審何日遂行初秋殘暑  
倍希遵繕而已

與李運使帖

王平甫

早辱寵臨區區荷不遺之高誼迫夜造門既而數客抵  
暮方散腹虛不覺過飽難于乘馬又恐公凌旦啟行須  
早寢遂輟是行亦不敢奉啟恐煩占答乃蒙賜教知己  
為具良不自遑翊日府中陪座以聽餘教實鄙拙之幸  
願也

與王學士帖

黃安中

疲病幾不生比乏力未敢動勞雖坐阻君子心旌懸馳  
不及奉啟以布區區特辱賤教甚慰甚慰某旬日可叅

告道遂長者矣

卷六十六

午間還舍得來示即捧謁門下值車馬出入不復待對  
但極悵望再被教約尤佩眷與之厚貺刻尊候安勝迫  
夜已放從卒休矣翊旦再到宇下使旋草此佈謝

伏辱教益不勝佩荷然某邇日所苦亦漸平親意終不  
願北去豈可再冒職事此心吾友必見亮矣前日已投  
狀乞近郡合入官皆勉從親意者某不幸早竊祿仕衮  
衮至今曾不能少有所聞而志慮凋喪竟何得也近念

及此中夜長歎冀得如所請而筋力尚完庶幾尋舊學  
以從師願兄素知我者故輒罄竭此深所望于左右幸  
無秘音問而已諸侯續上狀聊此布謝

與李判銓帖

黃安中

奉違已來困于行役以故不遑上狀及歸親側日有應  
答之勞懶怠殊甚想蒙矜察某疾病少瘳親意不果北  
去欲令求便家一晏非久投狀不識可得否久承教約  
頓爾睽異臨書于邑何可勝道

與林秘書帖

黃安中

昨日入局甚久疲而寢晚歸上馬矣辱諭要相見謂今早必于檢院相值不復還局黎明乃知告假適在殿廷不果即致問不審所履無甚苦欲謁恐未接客也

與孫校書帖

黃安中

久欽高誼往來府下迫于從事未果就見乃者不圖躬損道義先辱臨貺既不獲見盛儀而復失候問所舍無由走謝不敏之過將何以辭惟君子省察使得續謝于



他日何幸如之未間聊此為先某每入謁府常辱臨存  
欲修謁奉謝不識所舍無由一見比者到城下不少留  
亦辱留刺乃知君子真有意于不肖欲推而友之也然  
恨奔迫行役竟未見顏色故雖已領厚意然未釋然無  
限望也諸侯他日面謁告戒區區報謝豈足言哉謹勒  
叅問

與彭學士帖

蔡元度

今早講罷即止直舍承騶衛已出晚尤毒熱伏惟尊候

動止萬福某久慕下風比得親侍殆將一日竊仰高明  
欽戴無已會北還俟邇失依賴下情瞻戀何可以言拘  
文非假不敢輒詣牆屏不宣

向者附啟以干記室竊揆已塵省覽吳中風物公所熟  
游頤神燕閑想有怡適瞻企旌旆幾日來歸庶幾區區  
獲望步武矯首屈指不勝馳

久阻晤語不勝馳系昨日奉使奔走還家以來疲薻屢  
病欲奏記左右尚未果也使至辱手筆切承暄和孝履

支福欣慰無已某得請宣城但須舟尚難得之得即東  
矣未有展覲之期切冀節哀順變以副區區

與虞秘書帖

蔡元度

不挹風度忽忽數月企仰之誠未嘗少置昨日得王令  
書聞公行李已還不識呈試何如相去密邇千萬枉扁  
舟一來請坐兩日得知州中人事也病倦不及走見勿  
勿上狀

與梁學士帖

俞叔通

缺然承幸六年于茲困伏餘息遠斥窮海瞻望門牆邈在天外區區欲勤一日灑埽之役不可復得矣某鄙賤無取於世者希遇倖合既非所願為而於恩盼教誨之舊德竊亦自引於踈外而不敢為是數數私布悃款其心非有他也以謂士窮在下方退聽寂寞謹分安命而事餘意外在所務畧不宜更攀緣聲勢以召譏笑雖道義推重人人趨赴保無比疑矣而顧猶頽然誠以身世哀頽猶或勉強似非其稱是以一書之間久不徹于麾

席也仰惟高誼望末俗門下之列有能以是自信者得無舍其怠絕而憐其窮極耶伏幸念之幸甚不宣

與李嘉甫帖

俞叔通

身世紛擾日在馳走人事應答邇者尚失則遠者可知矣故于公久別畧不能時為書問以自見其跂念之情為恨為愧良益悵悵夏序已至伏惟蒞官餘休奉親多裕某鄉居如故但以累日重哀廣憂深未易晚去耳追昔握手之歡豈可復得耶官況必佳更切練養以須顯

擢勿勿上狀

阻遠言緒日深思仰私事萬端久矣馳問何勝愧仄比辱教墨達紙存撫過厚尤為感戢且承視事已赫休譽慰抃良劇不審邇來氣體何如末由叅晤倍萬珍賻行對寵除

謝惠詩帖

彭器資

瞻仰高義方切馳情辱教賜并示雄編奇詞俊筆兼諸作者之體鄙目震耀恍然如迷誠何足以窺覘涯緒哉

伏讀長詠但知欽嘆而已雨涼即惟動止萬福不獲造  
門以拜盛辱且請所未聞者區區祇益慚恨謹奉狀不  
宣

與陸侍郎帖

彭器資

雨後煩暑不審尊候何如伏惟萬福昨日拜貺出于稠  
疊祇益慚感鄙文漫繕寫呈左右久廢筆硯強此抽軋  
浮詞云云似涉多疎惟公不外倘賜竄改幸甚常人謹  
俟指誨

與李通直帖

劉侍御

數日薄有春思不審所履何如上元計多出游來日午  
間輒敢強枉軒從見過不以率易賜辱則幸之大也雖  
然非所敢必也惶恐惶恐不宣

與周承議帖

劉侍御

軒車到洛謂即得趨奉多故未果私懷惋結驟此煩燠  
竊計寢味寧適洛城天下佳處而主公好客無倦況當  
花時宜多勝賞敢冀歡讌餘隙陪加調節不宣



與沈秘丞帖

張子厚

遠去甚久雖起居之間不能以時修致而瞻慕盛德蓋  
未始忘無狀幸忝里舊素多提誨之賜此極思膝下旦  
夕又成行計歲云暮矣驅馳周道良非得已執事以長  
才遠業久淹外治休聲美譽播在衆口行聽褒擢以副  
人望區區欽頌之至不宣

與陳奉議帖

張子厚

鄙野之質事出濶疎獲從英游特序見厚方此相得遽

復乖隔情思迄今惘然盈懷前日游西山登蘿日以望  
城中浮圖樓觀隱隱可辨尤恨不得與公同之夜來抵  
慈溪忽得手教慰釋無量即今至香山朝夕遂西滋遠  
言笑倍希珍晉臨紙悵悵

與楊承議帖

錢祕書

一別又已改歲雖不能以時上問而瞻鄉風誼常若趨  
對即辰伏惟宰字有術神明陰相某遠惜輝潤方此苟  
祿再會未涯萬億加愛區區不宣

昔同桑梓今也哀親名在治封遂得與田里老稚均被  
仁政誠為善幸然遠跂高步非百里所能展用即聽迅  
召入當要途

與陸承議帖

方奉議

頃同里閭出于天幸今得明公治聞往來者稱道治譽  
之善小民被澤以為平昔未之或遇獨以薄宦南北不  
獲相共士人以歌舞盛化可量延頸耶然瀕海餘俗豈  
能久屈當有弃拜使天下均受大賜可副輿議也區區

之願實在于此

與吳侍郎帖

范景仁

近至京都旅見儀表不皇款對第深依挹特承手教彌切感懷比復忝姻末更增悚慙秋序向高伏惟台候康適某始至任所正遠門牆禱頌傾瞻倍百常品惟冀上為宗社慎加寢興不宣

與李廷評帖

蘇子瞻

經由特辱遠訪適以卧病數日及連日會集殊無少暇

治行忽遽不及詣謝明日解維遂爾違濶豈勝愧負謹  
奉手啟布謝伏惟恕察不宣

答李端叔帖

蘇子瞻

某聞足下名久矣又于相識處往往見所作詩文雖不  
多亦足以髣髴其為人矣尋常不通書問怠慢之罪猶  
可濶畧及足下斬然在疚亦不能以一字奉慰舍弟子  
由至先蒙惠書又復懶不即答頑鈍廢禮一至于此而  
足下終不棄絕遞中再辱手書待遇益隆覽之面熱汗

下足下才高識明不應輕許與人得非用黃魯直秦太  
虛輩語真以為然耶不肖為人所憎而二子獨喜見譽  
如人嗜昌歆羊棗未易詰其所以然者以二子為妄則  
不可欲以移之衆口又大不可也某少年時讀書作文  
專為應舉而已既及進士第貪得不已又舉制策其實  
何所有而其科號為直言極諫故每紛然誦說古今考  
論是非以應其名耳人苦不自知既以此得因以為實  
能之故嘒嘒至今坐此得罪幾死所謂齊虜以口舌得

官真可笑也然世人遂以某為欲立異同則過矣妄論利害攬說得失此正制科人習氣譬之候蟲時鳥自鳴自己何足為損益軾每怪時人待某過重而足下又復稱說如此愈非其實得罪以來深自閉塞扁舟艸屨放浪山水間與樵漁雜處往往為醉人所推罵輒自喜漸不為人識平生親友無一字見及有書與之亦不答自幸庶幾免矣足下又復創相推與其非所望木有癭石有暈犀有通以取妍于人皆物之病也謫居無事默自

卷之十六  
觀省回視三十年以來所為多其病者足下所見皆故  
我非今我也無乃聞其聲不考其情取其華而遺其實  
乎抑將又有取乎此也此事非相見不能盡自得罪後  
不敢作文字此書雖非文然信筆書意不覺累幅亦不  
須示人以喻此意

與章致平帖

蘇子瞻

自儀真得暑毒困卧如昏醉中到京口自太守以下皆  
不能見茫然不知致平在此辱書乃漸醒晤伏讀來教



感歎不已某與丞相定交四十餘年雖中間出處稍異  
交情固無所增損也聞其高年寄迹海隅此懷可知但  
已往者更說何益惟論其未然者而已主上至仁至信  
草木豚魚所知建中靖國之意可時以安又海康風土  
不甚惡寒熱皆適中舶到時四方物多有若昆仲先于  
閩客廣舟中准備家常要用藥百千去自治之餘亦可  
以及鄰里鄉黨也又丞相知養內丹久矣所以未成者  
正坐大用故也今茲閒放正宜成此然只可自內養丹

切不可服外物也某在海外作續養生論一首甚欲寫  
寄病困未能到毘陵定疊檢獲當錄呈也所云穆卜反  
復究繹必是誤聽紛紛見及已多矣得安此行為幸更  
徐聽其審某見今病狀死生未可必自半月來日食米  
不半合見食即先飽今且速歸毘陵聊息居我里庶幾  
且少休不即死書至此困憊放筆太息而已

與道源秘校帖

蘇子瞻

謫居窮陋首見故人釋然無復有流落之嘆哀病竒拙

所向累人自非卓然獨見不以進退為意者誰肯辱與  
往還每唯此意何時可忘別來又復初夏思企不可言  
遠想即日尊候佳勝兩辱手書懶不即答計已獲罪左  
右然惟故人能知其性氣蓋懶作書者有素矣中實無  
他也更望寬之知到官又復對換想高懷處之無適而  
不可江令竟不肯少留健決非庸人所及也無由面言  
萬萬以時自重不宣

與吳秋丞帖

黃道夫

更夕冒涉外何如伏惟安佳昨日得奉清賞何勝慰愜  
但以疾疢中不飲酒不敢曲留而雨作復不果追送良  
惘然耳新詩奉覽留之未辱垂見何也山居秋色亦可  
愛稍晴過天望矣攀仰攀仰

與運使國博帖

曹士衡

累日前顓走公卑恭致手狀計惟愚款已塵清几伏審  
邇日體中佳勝暑氣漸降雅對伊邈惟冀公外精加保  
練以慰瞻企謹奉手啟道誠萬賜終覽不宣

與吳朝奉帖

李資深

比者朝蓋因抵敝邑雖不獲款奉教益然久別之心喜  
于瞻拜故頃刻燕語猶足以解勞結之情違間踰旬向  
往倍萬庾伏暑溽伏審寓居端閒尊候動止萬福某汨  
汨于此過期不得北歸情悰無聊未易言道咫尺正阻  
瞻晤敢冀順時保育不宣

與王舍人帖

李資深

伏蒙貶教情禮深厚非所敢當以太夫人銘文見屬愈

增愧慄夫為人子者莫不欲褒顯其親以詔後世也惟  
有道君子為能言而又見信乎人若某者文詞行義不  
為當世所取所謂有道君子者比肩閣下不即求焉而  
乃屬某蓋惟人心博愛欲顯其親而使不肖之名以托  
于不腐耳敢以鄙陋同辭以負左右見愛之誠哉

闕

敬聞命矣特先此敘謝

與丘宮舍帖

李先之

自遠離年載之久區區宦徑奔走靡常思企高風愈愧

塵迹昨以取途滁陽冀遂刺謁及門不見固增瞻嚮朱  
道士惠訪出吾兄書筆仍談忘榮樂道之趣養生保命  
之訣蕭然風韻自得真尚不勝欽仰某仕宦之心亦衰  
落更聞孤節益為慚負手尺布誠裁照一二不宣

與林宰帖

王介甫

數日得奉談笑殊自慰懷渴仰殊深伏惟動止萬福鵬  
已領得感怍當有元給之直幸示下不然則魯自是不  
續人矣按田良苦惟寬中自愛

與孟秘書帖

王介甫

辱書感慰非兄之愛厚何其能勤勤不忘若此也奔走  
南北而多不能如意去就之際未知所擇安能無勞于  
心耶不知兄代何時到乎春暄千萬自愛以慰鄙懷也  
時以書見及不勝幸願前辱書感慰相并按田勞苦希  
自愛惟下戶所得亦不多又誠可憫至于豪右雖蠲至  
少未為損也仁明審處之而已質利甚輕但某亦自質  
却數十千恐不免嫌謗也邑事但痛繩之豈有不從者



乎按置一二人自然趨令矣日夕思一見無由當因檢  
覆至近郊能入城否或不欲入城憚請謁之煩即示近  
郊示諭當走城外奉謁也

與劉秀才帖

王介甫

久不聞問忽得書承侍奉萬福良以為慰見問進退去  
就之意蓋道之所存者意有所不能致而意之所致言  
有所不能盡第深考微子一篇則古之聖人君子所以  
趨時合變蓋可睹矣阻濶愈遠惟自愛數以書見及

與丁元珍帖

歐陽永叔

向在府中困于煩冗久不奉狀徒用瞻思專人劇來特辱嘉問承涉夏以來體氣清福乃心欣慰元珍才行並高而困蹇如此吾徒之責也某昨被煩使初不敢辭然鯨劇之才素非所長加以早衰多病筋力不支屢自陳乞蒙恩得解去實出天幸然請外之志尚未獲素心又以殘史終篇有期夏秋之交可決南去相見未涯千萬鄙懷臨紙不能悉布惟慎重自愛以順休皁

元珍淹屈于外交游所宜出力既默無所為而至于書  
問亦不能時致其勤其為慙罪不待言矣元珍自蒙恩  
歸院雖稍清閒而忽忽度日公私無所益此處京師者  
汨汨之常態也某非甚愚頗知脫此而遠去然事有不  
得遂去者古人所謂不如意者十常八九殆此類也今  
歲得人之盛中外共慶況在佳辰高興良增喜慰因胡  
推行謹奉狀相次陸君行當別布懇

與沈待制帖

歐陽永叔

數日不奉問苦暑非常歲之比少壯者自不能當衰病之人又更可知焉辱教承體氣清安甚慰俗以立秋日卜秋暑多少譬猛鷺之性猶餘更猖狂耳然世言春寒秋熱老健謂此三者終是不久之物也介甫詩甚佳和韻尤精看了却希示下

與劉原父舍人帖

歐陽永叔

數日不奉見餘暑頗甚伏惟起居佳勝某昨羣牧會以熱中飲次過多偶為腹疾兼以少幹故逐日在告只三

兩日當即出叅特煩問念感愧曷已乾燥非常何時可  
飲未嘗如此寥落也人還謹啟為時自愛

專介辱書承此嚴寒為政外尊體休裕實慰企想某以  
衰病當此煩冗已三請江西要在正初必可得艤舟亭  
次寓目平山奉賢主人清論豈不豁然哉新春為時自  
愛

與常先生帖

歐陽永叔

相別累年書問雖闕而思慕盛德未嘗一日忘于心不

審即日體候何似某碌碌于此國恩未報而衰病日侵  
進無少補于時退不得幅巾間巷以從有道之樂豈勝  
區區向蒙寵示盛文一編究味意趣殊發蒙陋珍玩秘  
藏未嘗暫釋續更有新作苟賜不鄙無外開示至幸至  
幸深冬為道自重

與蔡省副帖

歐陽永叔

昨日無以為禮深用慚醜宿來動履想佳然中席遽起  
遂不可留變此新例他時東齋之會敢不遵用故事也

適得冲卿簡言原父已送詩云某殊未有一句欲借一  
拭目以發哀鈍三日欲去出城送冲卿能往否此不敢  
強聞及之昨日知與冲卿賞月必有餘樂某亦邀同輩  
二三人淡坐不飲殊亦鮮歡但飲冷過多又病真不能  
追逐少年矣前時烏絲欄輒留欲書其後尚未有暇適  
因尋書別得少佳者且納上聊資揮灑望賜之燕閒以  
試為一閱後日方得奉見謹此啟布

與權郡國博帖

丘道源

河南丘濬謹致書于權郡國博名公几下某嘗以孤直  
被時憎惡自滌移歛羸于是郡四海之廣既無所容遂  
僑居于城之偏隅為貴地編氓首尾五載請官莊一區  
謂之紫巖僦耕牛雇夫役競逐錐刀以贍老幼值此年  
俱旱租米不可輸今歲尤甚飛蝗遮天蓋地仍新法省  
沓更易綱紀千變萬化使官私不得其安伏遇閣下當  
仁廟朝嗣賢相國之後日覩變理規範洎出鎮巨藩布  
政行令細細大大如日星燦爛在上皆可閱視加之負



英特氣雄毅過古人誠信包當世民情吏事毫髮無隱  
此乃大君子求瘼濟時之切也某在閒寂中于溫飽外  
值凶荒際比屋之中有利有害深欲裨于見聞徐而思  
之況忝以道垂知己之遇豈敢惜其所得以犯乎僭易  
之責也謹錄其條件于左幸公暇稍賜一覽足表哀老  
者有憂天下之志也不宣

與徐君會少卿帖

丘道源

某頓首致懇于知府少卿君會麾下某六月五日遞中

蒙貺書誨發膝踞誦之至追念恩獎不覺淒沮然久睽  
風鑒易遷冀朔但仰至交以道敦守順養有素豈非積  
善慶于祖先締仙風于孝嗣在乎今日也某回秋浦近  
兩月餘值梅溽連綿江垞卑濕雖敝廬高爽奈陰沴煎  
熬多稼來薶例皆蕩去遠邨近郭罕有按堵揣念故鄉  
必不至此某尚賴脩鍊所守坦夷是任覩茲物態孰不  
憫嗟但醉飽之餘枕簟可恣或脩合妙藥或曬曝古書  
或埴蔬畦或補綴名畫散誕而過憤鬱都忘竊領北樓

清虛名園開豁池蓮畫麗山月夕輝琴薦棋枰箋詩茗盃  
溪鱗供饌厨醞新筍在布政之餘當無事之際營慾恣  
涓浩然自得亦足以優游于考績之外也某以里人來  
唁既還託附諛誠并新著三篇呈納冀助討論之萬一  
也

與曹輔之著作帖

丘道源

公阜至承示諭知乘弊政之後撥據不易況食其祿豈  
憚勞煩但須勉旃別俟遷擢某雖寄輦下未有生計但

聚族蠶食而已如其于十二月二十日得替必離滁上  
四月上旬方到待相見細縷若不替共謀久住計即且  
盤桓三四年如其不然則且隨花木徜徉居于潤州也  
却請得二十五個月折費及三節支賜粗可黽勉度及  
春初之費矣勞生如此反被養家兒男俱不得力但危  
坐愁歎而已如諸令似俱有成立大志左右又何愁歎  
羨欽羨且自寬中節調為妙不宣

某泗上送吏回曾附書必達几下某十九日至滁孤苦

寂莫不可言狀左右必哀感之令嗣想上京否且望早  
督之行為家中絕無管幹二子一病一懦須得之管勾  
早圖船下來脫湯火之厄也切祝周親以某衰老送到  
滌馬子告代步一兩程他不敢造次干浼某啟白直至  
承示諭且審起居萬福喜慰可知也某一家幸平泰只  
是此月十日聖旨到候病痊日須令歸歛某兼為武林  
物貴生涯難營不如歸去更敢煩朝廷也但以年老不  
如求一安樂去處兼為呂郎中是故人大段為營置第

宅待某居住仍一切親友一一望歸也彼中飲膳柴米頗賤易為過朝昏桑榆之影寧有幾時若滿一百只有四十年在況造化不可測耳且自寬心養道近日愈清健祖龍圖甚相愛卹津置前去極備恐知之左右偶疾且宜將息捫節為妙若此病未愈將來或移入廣中彼恐難為將息不如求取一監當差遣于江浙為妙浮生區區又何必奔忙于名宦也請細付之

兩次歙州牙校上京曾奉書與令嗣上訂尊候必已達

視聽也夏熱亮視政外安裕否某還里中親友相待甚厚頗得優穩因禍致福自古有之今復加脩練之功筋骸清健萬倍于昔時兼亦一家和樂無滌上困窘之苦愚男彥武于豐口開一酒邸營生周給不勞憂念他日移命當有二廣之行況娶女是舊游之地必可經從一相見也近得令嗣書知忽違和已會勿藥之喜少寬思係貴閨眷如式或牙校回者各望音繹俾慰懷抱也

與張秋校帖

蘇子瞻

報恩院主才公近有書及茶來猶以記文為言僕近為  
憂患所困苦幾不能脫正坐作文字耳已燔筆硯不復  
作一字矣且為道此意石觀音記特煩寄示豈敢作也  
千萬察之

與高夢得帖

蘇子瞻

近辱臨訪喜接笑語從者遽還不盡區區人來領手教  
開諭累幅足見相屬之厚然稱述過當皆非所敢當僕  
舉動疎謬齟齬于世既忝相知惟當教語其所不逮反



更稱譽如此是重不肖之罪也悚息悚息新闕尤增咏  
嘆然栢舟之諷何敢當此諸事但旦暮靜默事既無補  
祇益增嫉耳如因入城幸畧見顧未間珍重不宣

某游門下久矣然未嘗得如此行朝夕繼見聞所未聞  
慰幸之極已別悵仰不可言經宿伏惟台候康勝不敢  
重上謁伏冀順時為國自重不宣

與徐安中帖

蘇子瞻

寵祿過分煩致人言求去甚力而聖主特發玉音以信

孤忠特未敢遽去然亦豈敢復作久計也老兄淹留如此終不能少為發明愧負何已宛丘春物頗盛牡丹不減洛陽時復一醉否辱書伏承起居佳勝知辭還少緩思仰勞賢者當進而久留不肖當去而不可得兩失其安可勝嘆耶人還忽冗不宣

謝唐林夫帖

數日不接思仰可量陰寒伏惟起居佳勝生日之禮豈左右所當屈致又辱高篇借寵哀病感悚並集旦夕走

謝奉啟不宣


與曾子開帖

蘇子瞻

經宿起居佳勝來日欲同錢穆父畧到池上扈駕還便  
往公能來否別無同行穆父甚喜公來可攜帽子涼傘  
行也可否示諭不宣

與達道帖

杜甫詩云張公一生江海客身長九尺鬚眉白謂張鎬  
也蕭之云用之則為帝王師不用則家谷一叟耳



五百家播芳大全文粹卷六十六

欽定四庫全書

集部

五百家播芳大全文粹卷六十八

詳校官侍郎<sub>臣</sub>劉躍雲

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>李荃

謄錄監生<sub>臣</sub>龔際美

欽定四庫全書

五百家播芳大全文粹卷六十七

宋 魏齊賢

葉 榮同輯

尺牘

與吳樞密帖

張太尉

比者叨奉制恩入陪機政哀拙無取非所宜稱遠辱台翰重憎惶懼秋爽未由瞻奉伏惟保衛

與蔡學士帖

王伯庸

累蒙軒蓋見過便合躬詣館舍實以秩牽不敢遠出未果謁謝伏深惶懼辱索亂道謹呈藁草一卷不及令人錄上或寫畢幸冀封還并有奉送拙詩聊以將意不避取喙謹奉手啟

使軒過都不得款奉睽遠又更時序良為耿耿茲承視事方欲馳啟先枉教幅珍重愧感何以云喻府事叢劇正煩經制暑中更願加愛不宣

與劉判監帖

張郎中

近兩辱賜教極于勤厚感戴風儀非一日可既伏審日  
奉諮詢榮問休暢慰拊慰拊某被中旨召書石經以字  
體小成于義當往但愧無似孤奉粉飾之私耳即日沂  
淮及泗舍舟而徒上元之前期至闕下投謁非遠預增  
欣快未間伏望上為邦國壽神自重

與虞秘校帖

楊公濟

比入城莫得與公為集然以大暑伏牽于人事竟不能



從容以款益論良不足也還家日欲馳問病懶遂成因  
循比辱貶教尤荷存記仍審即時所養自勝聞行李非  
久西上咫尺深欲一見數日炎氣如焚復乏人船不果  
如願乍遠希自愛

與于朝奉帖

王舍人

間闊之久所欲致于左右者蓋不待言也前此被教以  
乍有職事未及上啟方期少間附問端使辱賜書存諭  
勤款其所以慰藉使區區向仰之萬一若得侍聲款之

餘也且審比日動止萬福闔第一一均休某竊祿承乏  
于此兩月矣自惟孱陋無所補助惟慚慙耳正遠言色  
切冀以時自愛不宣

與陸剛叔帖

周開祖

欽仰德誼為日益久第以疎遠末由叅謁之期每深引  
向又前日率爾以上手狀方止瞻依遽貶教賜此非謙  
厚之德發于誠心未易及此欽服不已伏審即日起居  
萬福豈勝慰懌跂望門闌甚遠邈無緣一造左右以丐

教益臨風重為於邑更期向時厚養以迎休命

與范奉禮帖

周開祖

一官海隅浸成俗狀久因縣道未能擺脫此任已過滿  
數月而代者稽留未至遂至濡滯未由解去然敝邑幸  
竊隣治境得託于仁比之下所恨賤迹非久代去不得  
久依賢者以觀善政為拙者師慕之法此私心之所悵  
然也尚賴餘比因風敢乞見教

與孫大博帖

周開祖

不肖之迹竊同里閭講聞風誼為日益久最爾晚生無  
由進望聲采但積欽仰茲者補官下邑復邇治封仰託  
餘庇冀免譴斥而善政流聞多所師法退惟平昔嚮往  
之誠慰幸何可言者區區未獲造請伏乞節宣自壽不  
宣

與黃戶漕帖

毛澤民

頃移病在家從人過門而不以時告逮作簡求館舍少  
遂區區已是還車之後矣辱教承未此見絕感愧感愧

大熱起居勝常未即占見切冀自厚不宣

久不奉款思馳飢渴強顏于此形影蕭然為魚之心夢寐去江湖間也顧如吾兄尚屈州縣復何言哉大熱非人所堪眠食之外百事舉廢間惟挾策就枕相見千載人物也金丹多謝如此豈實堪驅策以助餘勇耶一笑適與客飯來介迫書以故畧甚

杜門于此甚廢事朋游益落寞願見公不可致大熱非人所堪掾舍一大甌耳奈何杜門閱書時有所作不識

畧借以開發蕪鄙

與葛興祖秘校帖

王樂

病中數辱書相期甚遠深見君子厚意感悅感悅某請  
郡雖懇宰執不果得龜勉又當扶力朝叅美官清仕乃  
使不才賤蹇之質是處自視豈得安哉諸宮教授舉人  
甚多而諸公偶遺盛德何愧如之遲之以俟彙征之吉  
餘冀多愛

近得書不及附答復蒙惠問感戢良甚某在告月餘羸

尚未能復向苦癯痺今寢成緩弱遠行久立力皆不任  
近時發憊悶乃知決是脚氣方書此候為劇不無憂悵  
特淹然之軀迂疎之才尸占近職欲何之乎故每疾作  
屢丐間退豈可以知止養恬自美實以官祿過量欲粗  
緩他人誅譴之謀耳足下徒以一日之知不深索其真  
有難堪者漫加進免期于遠大昔所謂責望賢人之大  
道豈施于我輩者愧畏愧畏行求外補深負良箴承行  
田良休暫乞縣邑惟強寬勉備灾之說文工事覈益見

為學之用欽善欽善不宣

與唐夢得秘校帖

黃戶曹

賤迹之到金華首聞君子之善相望百里常恐不遂願  
見之鄙昔乃邂逅出自夤緣披晤雅風重為欽仰自別  
日欲上狀塵累無窮力或不給過承賢者曲有頒教感  
荷愧怍豈易殫陳即旦未審動止何似恭惟道腴自足  
外每多清福也不肖已歸金華未期并合渴慕渴慕餘  
乞保愛不宣



與樓謙中秘校書

黃戶曹

講服德誼久之鄰封數舍無緣展覲方此趨府寅緣一  
見游從累日而立談有古風出語無俗忌坦然索我于  
形骸之外而不啻十年之雅遽爾別去恍若有天但神  
馳而形留方此懸懸遽辱教墨且感且愧山邑僻左如  
坐深井書史束之高閣而筆硯塵埃積有日矣未悉何  
日得遂晤語有所啟發因風無吝惠音鞭所不及餘惟  
眠食自重

浦江事簡加之明君子相與裁治聞日中則庭無留人  
終日相與清談而已欽羨欽羨東陽山水固有之絕無  
佳處但重崗峻壁斷崖鳥道要非人迹之所至時有驗  
定不免攀藤蔓緣蘿徑而上乃至絕頂下視萬仞之淵  
令人股栗而背汗當此時乃知五斗米不易得也塵埃  
奔走惟我為多而趨尚高灑當君之所獨也為一家迫  
以吏役出入畧無寧息鄉下得公書益深感愧跂仰風  
範惟有馳情餘非筆舌之所能寄也

與林仲遠秀才帖

鄒正言

邇去左右倏忽累年下情仰德何可云喻即日尊候動止伏惟迪吉某抱虛類宮未遂斥去餘芘所逮良以爲幸比來講習甚處所與共者虛誰公學術之優淹回久矣此舉當遂奮亨以光下交更冀淬厲正阻前見切希以時自愛不宣

與鄭武平宣義帖

蔡推官

倅來辱書見意竊承忙政之暇由閫而內共保康佳遠

情深慰蹈老無少立但勉勉自全而已願無見恤清秋  
景物登臨感慨而人擾擾如川之逝吾何能久皓首高  
志是以奚為悲夫勞生竟止此耳某人持觴覽詠意思  
何如輟暇行樂人誰如之無自阻也時引望天末雲山  
相接君子不可見乃心何如萬萬順時自重

與錢舍人帖

蔣穎叔

舍人以職事得責此固賢人君子立朝之大節可無愧  
于古人矣名望事業固已素重于天下而由此又益加

重在小人以為可唁而君子以君為可賀也士之進退固有義命不計于一日升黜之間則今日之貶安知不為後日光大之漸也世俗慰藉之辭皆非之奇之所當陳左右者惟汎然自豫不問朝廷貶責之輕重隨所至而安之以俟進用者此惓惓之所望也

近附宗魯以手狀通門下亮塵視覽即日舟御伏計已至淮南尊侯萬福舍人以忠正得罪內無所愧者然朝廷之貶責亦太峻矣前未有此乃士大夫之深嘆而重

惜者在不肖尤為悵然也公議自存滁陽之行旦夕當  
還願幸以道自處無以得喪經懷而安於義命乃區區  
之望尚遠乞為國加重不宣

自舍人之貶所論者皆以嘆處比承居之安然殊不少  
動何莫非君子所造之深而有以自得也然臺列無一  
言以為援救而持公議者頗不平之舟御父已還鄉里  
為時徑之貶所也千萬自愛

與錢舍人君倚帖

向蒙賜書未暇脩答忽聞有滁上之行自古君子立世未嘗無此有道者恬然無戚不為世俗所窺區區之望也滁雖窮僻然山泉飲食之樂能自處以理固無出處窮達之愧況君倚學深守固必能了此惟慎密勿以外事切切凡百事自樂但時苦疾病然今頗康矣復何為哉窮而益堅斥而益高惟君倚勉之

與馮待制帖

呂濟叔

辱教且審興居之詳冬日不宜疎利切忌動臟腑也連

日迎候亦以為勞不敢去求見恐妨息偃伯鎮之命固  
知必有謂也然無根之語尋常自明必有知之者世路  
難附甚矣俟面以罄不宣

與王承議帖

張司農

昨日承教還華嚴適少幹不及隨答深喜體中寒瘁已  
安元正伏惟多納福休某罪大廢棄固宜朋友所當貶  
絕而公誨慰者有加第自感惻然自此遂得息心于此  
庶幾古人真境之游矣雪開俟車馬之音慰此牢落不



宣

與李大博帖

馮當世

素未相知今遂得一見與君相愛懽如平生此以私跂  
遽爾分別豈勝不足某今且在洛陽粗遣不煩念及回  
首門牆傷如之何行矣自壽

與李龍圖帖

馮當世

承示書深悉慶慰嘗一到府廨褊陋但東園差勝耳同  
年七人皆動介甫何峻而君倚何衰也而君操又皆在

極寒日與贈伍何其異耶年來志氣消沮蓋大憂累年  
不能堪之耳日夜惟望南歸江湖予樂也寵及川牋至  
愧至愧蒲萄四蘿輟附來介餘輩遵攀企攀企

與李大夫帖

黃秘書

某備吏府下久託大庇如嬰稚之慕慈親鞠育教誨無  
不朝夕有望仰惟顧遇之隆孰與儔比偶沿漕檄遠有  
千里之役亟去門牆不勝眷戀中竊料中秋比還賤局  
時執事已被嚴召趨赴近班悵然無所依附預深黯結

之誠炎暑向盛倍祈精調寢餽別膺大用無任虔頌不  
宣

與俞教授帖

馬朝散

違離未久感戀良深奉惟自還郡而來所履無他門中  
皆安也某月三日方渡江今留杭未能亟行幾望恐方  
北去益遠言笑千萬自愛不宣

與郭祥正太博帖

章子平

介來辱書并惠雜言及新詩十首啟緘伸讀感與抃會

恍然若掀雷掣電霹靂羣動使人覓驚覓悸何氣質之壯至於此耶冷然若冰壺雪竇漱滌萬物使人骨寒而神濈何詞句之清至於此耶而又揮毫落紙灑然如龍蛇之蟠蟄烟雲之卷舒使人心開而目明何筆力之精妙至於此耶天下之士其才性如功甫者孰為勍敵哉鄭毅夫吾叔表氏及梅聖俞皆謂功甫為李謫仙之後身吾不知謫仙之年如夫子之少時其標格淵敏已能如此老成否惜乎賢士大夫未有以功甫之名為天子

道者予既力弱而言輕難取信於當世又不能與之陟  
虛閣臨清流飛大白笑傲萬物聽玉聲之琅琅憮然於  
中烏得而已耶春深氣暄強飯自愛不宣

與蘇世美殿丞帖

沈叡達

近者幸得瞻奉實慰嚮往比復詣館轂乃承行矣即日  
伏惟榮歸侍下動止萬福不審車馬早晚東下會晤無  
由但有馳想暑甚敢希善愛以對光寵區區所望也  
近幸款奉少慰傾向不審還止嚴邑動止佳否某區區

更三五日遂歸明方遠言色千萬善愛子光居喪無恙  
尚未出數求見之

借小航至杭省親不知局中有否不然僦一航亦可賤  
累且束裝矣

與呂尉帖

錢君倚

奉違未幾殊深馳向使至先蒙圓封為貺益用欽哉伏  
喜陽生尊候均福慰浣慰浣至節不果前慶唯冀倍迎  
休祉佇期享此履長虔祝萬一也

與郭功甫太博帖

鄭毅夫

曩者辱示長篇病懶不即為謝前日劉推來又蒙手諭  
及佳制巨編讀之令人直欲仙去耳欽嘆欽嘆荊州事  
簡頗有勝境恨無健筆為之揮掃尤所懷想也初夏加  
冷自壽

與曹輔之著作帖

舒信道

某啟侍堅道兄讀書於越之蒙山山枕湖氣象頗清絕  
復僻不即賓客援毫開卷間有倦色則短舟泛酒拾落

果釣溪魚醉倒于湖月影之下無用之身所失如彼所得如此亦故不為世笑也

與呂少府帖

舒信道

向以狂妄見黜於朝毀于鄉人深自退縮不求聞達也承累索文字某不敢辭拒復承過有譽許此乃見左右包荒溢美之情也餘留面目以盡區區

與蔡密學帖

張安道

乍比睽間良劇瞻詠使至承示盛詩辭旨精確句實流



暢真作者之言欽服欽服樞密給事早在諫垣議論切直輝映前後今所規正皆時之急何不可之有不宣

與金華宰帖

陳郎中

近者有方臺之行而道出大邑承足下越數百里訪我於山館經三四夕為之會聚舒笑相樂甚增方外之意昔有解體世紛浪情物表者茲焉無所愧別後闕于贊問惟瞻企粹表何勝依悵首夏希公外自重

與李通直帖

王正通

昨日特承顧遇良深佩仰得簡喜起居安適昨晚歸後  
懷佳山水之景非人世所當有欲作一詩未有好句以  
稱之徒為恨耳有暇可以同見仲叟忙中不一

與李侍郎帖

孫巨源

伏蒙寄惠妙墨尋滌硯試之其衆美備矣前後為充海  
太闕不留意都無以為此誠文房之至寶也仰荷  
厚意無以為報惟感荷無窮耳

與丘道源殿丞帖

李仲求

無狀被逐幸見故人暫聞玉音實慰蓬累辱示手教并  
佳篇旨意高遠讀之感慨不能已已季長相見當為之  
盤桓況御史在船必無他謗唯湖陰宛陵不得不覺察  
也呵呵景純又未及拜狀敢煩致懇山野之性乍得脫  
此輒復放縱臨紙不竟所懷惟自重以副馳情景純下  
問欲為易地之請此甚無妨願速投之從否計朝廷也  
不宣

總奉二教又辱佳篇感嘆無已冬仲加寒伏惟道氣冲

勝南譙詩得安問陵陽佳郡景純賢守樓觀歌舞一時  
之盛道舊故為笑樂甚適無窮使印綬可投夜起待旦  
東望賢聚恨恨耳二書輒寫以為秘藏更煩見索謹納  
行楮聞適外邑得無冒犯之勤日企還車以丐餘論惟  
祝自壽不宣

與周朝請帖

謝師直

中秋氣候蕭索不審適日興居何似某無狀比讀書作  
詩飲酒皆懶不喜唯嘿嘿瞑目燕坐或眠耳然則尚得

復為吏乎時得以方士語以解頤耳餘光無幾且求自  
便是為尚何暇一一為子孫計乎半夏陽起石防風之  
類如不貴切寄惠殊所切用也藥彼有而此不如者願  
勿惜也臨書馳結

與吳承務帖

秦太虛

窮冬急景佛舍蕭然甚無聊賴以此頗深企想不審公  
外履尚何如西臺法帖昨日方尋得謹馳上公家筆法  
妙絕如此何必更求他日所書乎繆幅更不敢為獻情

恕幸甚

與范堯夫帖

秋來雨水頻併聞府下民田多苦潦濕又蝗虫為害不  
審如何勞煩撫綏將下兵皆西行巡邏例闕人何以為  
畫也此郡地帶江湖雨水差不為害田收可得七分又  
蝗蟲自北來正礙泰山不能飛過乃稍循山向西南去  
以故到此者亦少二事俱為幸旌榮相違咫尺阻奉言  
笑傾渴傾渴

謝李運使帖

元厚之

溽暑漸涼伏惟德履清勝欽企邇者兒子來辱惠翰墨意愛加厚感慰無已小子愚騃足下以鄙夫故曲垂存照凡今之世觀勢厚薄為之輕重乃知賢者富于道義不為此態也銘感嘆服竊承漕事頗冗暫勞裁決王卿出陸而來必非晚休息矣未涯瞻對惟冀以時保重

答丘道源帖

元厚之

睽間近二十年各乘風波久不會遇瞻企盛德未始忘  
也去冬自朔部移番禺泛潁絕江踰嶺萬里四月到官  
六月遂還冒望大暑一家番病次臨川女子傾逝今將  
其旅櫬西歸卜此月二十舉亡兄以下七喪歸塋先塋  
到此旬日匆匆少暇未敢入城須襄窆已事乃修人事  
前人見擇之言同年經遊在此方欲修問辱貺真誨但  
深嗟感高年多難惟宜自寬腹疾亮漸良已下弦到府  
中即詣門館餘須面布未間夷中自愛不宣



與張龍圖帖

邵興宗

首夏清和體履佳謐承出領留都涓日視事幸鄰封畛  
先辱緘誨何媿如之未涯觀集惟以時倍加保護勿勿  
脩謝不宣

答蘇子平帖

錢濟明

昨日竟不得一別為恨欲上問又未果乃煩手教先及  
感忤亡量餘暑伏承起居佳勝承遷居江上亦復擾擾  
但文君相對四壁清風自可樂豈可與向來同日而語

耶蝗害小及已破五十斛倉儲書所謂有本者與公正同也何緣晤款萬萬以時自愛不宣

與呂縣丞帖

錢濟明

衰病侵尋不能結茅山水間以逐魚鳥之性雖日杜門未免喧囂緬懷淵明我醉欲眠抑當且去之適未易得也每念君家兄弟翩然鸞鶴姿耳又復不得相與助翔雲杪向往可勝道哉了然師來出所惠教伏承履茲歲晏侍奉萬福某老懶百無所堪惟思睡耳了然來只說

閒話兩日之席已能使人胸中珠琲跳出公兄弟久與之親耶亦聞有意見臨便欲倒屣須能屈就茅齋十日晤語若作子猷訪戴孤雲去來只堪留與閒人傳作奇話耳如何如何未緣一奉笑粲子平或歸願及意餘覲履端以壽親庭無疆之休謹奉手啟不宣

與陸奉議帖

趙提舉

稍寒伏惟布政之餘動止增勝某不肖講服聲稱為日甚久比者獲倅永嘉而幸在鄰庇有若夙會方欲脩問

乃承賜教所以獎引之意良荷感慰而已尚遙叅候敢冀珍衛以須寵擢不宣

比由治邑幸際顏論辱顧殊厚感愧第增奉違逾月雖劇馳戀而別溫匆匆未遑脩問首承賜教曷勝銘荷冬凜伏惟自重不宣

與楊朝奉帖

陳伯模

偃伏高誼曠日持久比承下車阻遠不獲叅賀即辰嚴寒伏惟神決之暇榮候休福某鄙野無狀蹭蹬場屋始

竊一命守官淮甸土廣事煩固非愚拙所能當也到任  
經年粗免曠敗敝鄉有幸而得賢守久欲馳書上問尊  
候以賤局百冗出處不常用是遲緩深負愧歎臘窮春  
啟切祈若時自重以對光寵不宣

與李秘校帖

袁思正

前日特承左顧仍以奇文一軸見遺于不肖久此愧處  
乍窺高蘊如于鄙室獲睹驪珠光耀襲人畧無間斷一  
何偉麗卓絕以至于是耶感戢感戢春寒伏惟德履萬

裕某今日適有數親客見訪未及詣左右專人聊此布  
謝萬一不宣

與周朝宗帖

陳留別後不復顏論者數年中間塵忝丁艱逮從仕宦  
南行無由上狀以承動止唯是鄉往之懷未嘗于左右  
廢也早春氣候微寒伏惟尊體起居萬福某待次金椒  
在明年秋食貧里居殊愜鄙懷望塞垣幾三千里何緣  
參晤臨紙不勝惓惓餘惟眠食保重以對光寵不宣

調官京還席未暇煖即督赴官去月二十七日到縣交  
割彈丸小邑聞見極少地褊迹寒何望知者廨舍粗完  
園池亭榭畧有位置處更得盜息事簡拙者私幸前日  
折腰趨府愧汗浹背半生讀書出應其數若此信知平  
生健慕他人正是業識去鄉不遠常冀流音以慰孤陋  
至望至望

與黃魯直帖

領太平事八日奉朝廷罷歸吏部當復還荊州稍謀生

事道出治部奉別才百許日及得瞻望實慰馳情秋候  
小冷伏惟尊候萬福比晚詣賓次謹勒手狀不宣

春深多雨景氣未佳不審化境何如伏惟樂易之政民  
得職雨暘時若粟麥茂好神所相勞寢食且宜前者人  
還蒙答教且有招延之意感服無以為喻寓舍既完遂  
成懷土未能即去答仰榮戟何日不勤謹附承動靜

承誨諭致蒲圻紙適家侄無悔蒲圻作尉即令往市紙  
多滓又薄厚不均色黑似不堪用有人惠分寧化紙差



白但苦薄耳謾往五百或可作家書耳新雙井分上數  
吸蕭君解岳陽尉歸廬陵乘鄂渚江至貴部欲得依高  
明得一舟至南康不審可否蕭君廬陵文士亦強毅有  
立不肖與渠父子遊故輒恃眷與請之幸垂盼也

間者往來道出治部過蒙地主之禮勤重千萬別來懷  
想何日不勤傾至武昌即留居完葺民屋久之乃小完  
是欲脩記亦不暇也

日春寒不審尊候何如伏惟晏息安堵寢食之味神所

相勞

闕

避范德孺法當遷居輒欲就貴部求自謀一

舍不敢煩公

闕

知有責降宮觀人在貴州否某已

具人船聽誨諭乃發耳

闕

有親依之便望路欣欣

謹勒手狀以承動靜

闕

即日伏想尊候萬福和父所苦想漸平否時有清集以

謝

闕

比見逐客之名未有在貴州者但疑孔毅父

或歸來耳然

闕

屋在金陵不能無疑故不敢徑往

依投耳早得回書幸甚

奉別兩見秋暑懷想何日不勤夏中兩上狀不審皆得  
達几格否不雨四十餘日歲事幾失望時雨三日甚慰  
人意想貴部亦沾濡秋成有望憂民者可以加食矣蕭  
彥和解官去新通判謂誰相歡否某寓居蒙免未緣瞻  
望臨書馳情伏祈為國自重

比來不審尊候何如伏惟平易得民人有和氣寢食之  
味神所相勞時時到廬山否孔毅父竟來否何元吉必  
時到樽前前書恐公茶具中有分茶盞有餘者乞一枚

乃是范德孺所欲如有願輟惠也外甥前繁昌尉洪羽  
謫處貴州當蒙庇賴欲得一安便泊家處盛暑煩溽不  
審尊候何如伏惟民平易近民民已信服府庭清淨飲  
食之味神所相勞傾者追盜急迫今必以肅然矣寄建  
溪茗此間無有草蟲扇又及時併深感刻紙是鄉中莊  
客所作品色極下但可代匱耳今再奉五百價亦極平  
不必問也有小鈐妙者時分五七片足矣未緣瞻望臨  
書馳情伏祈為國為民自壽自重

昨蒙惠教勤懇并貺建溪珍品敬佩不忘之意即日霜寒不審尊候何如伏惟忠厚樂易風行偃草樽俎談笑自得江山之助承誨諭欲求閒冷恐不能無嫌也未有瞻承之便臨書懷仰伏祈為民自重長使瘼寡得職

奉承清談不能三日遂作遠別何能不惘然承旌旆晚即出城不審戾止寢膳安否千字文愈看愈好此字奇書也遇知音必大賞之不肖何足惜重承囑累之勤謾書數字或附此書傳耳旦暮啟行臨書懷仰伏冀珍璫

再拜上六舅安撫龍圖專人及寓遞兩奉委曲審下車

南

闕

嘉靖慰喜無量即日天氣日涼想穰下雨餘

亦有秋成之望

闕

安樂來已半月五六日飲食起

居皆佳也七兄到此留十餘日

闕

行計五日以前必交

局矣諸處皆得安問承遣十七到謝家

闕

謝推被攝

幕府書甚慰懸情耳阻參侍忽欲五十許日曷

闕

伏祈為國自重以綏百福不備

與李端叔帖

久別教席仰詠不能已暑伏舟行良苦尊候起居何似  
區區欽款緒餘常有願親不足之懷於是又將西去瞻  
望數千里未卜承侍之期臨書黯然敢冀季順自衛鄙  
誠千萬蓋非書所能盡切幸矜照不宣

自承召命白計行李須郊外迎見遽領教墨深愧已後  
時矣將聞德誨咫尺欣莞可知

兩日少故阻奉教席瞻向盛德義不少忘伏惟從者無  
恙承今日殿對遂即黼座問勞之際想慰淵衷佇望之

久方從出局偶餞一舊僚出城明日當叩師几久不承  
師誨雖一再具書而瞻仰拳拳蓋非紙墨可致者其欲  
見之心不勝朝夕東引伏辱手教曲記過存伏審赴召  
已次都邑霜寒尊候起居萬福出局遂造席末區區謹  
俟侍坐布露

孤苦待盡久不得君子之教雖餘喘不復自理向往之  
私惟日比永遽至忽奉手筆藹然風義未忘罪罰而遷  
官之慶有愧通問之信獨緩比日復不審為況何侶恭



惟庭闈康靖眷集均福書成尚在改歲常格所拘稍滯  
雄奮古者治定功成之際玩心神明而沉敏之才多後  
于躡等良務寬大以竚類求

自去冬南去即不與北事相接北歸亦不復可得  
不審涉春有以自樂否成書杳不聞期計已有序何日可西  
上公所謂信道薦而自知明者淹回歲晚不失為楊子  
雲更期自厚以永終譽所寄詩寵及益見作者之高興  
坐汨塵坌能得諷詠之無窮也感服感服自餘頻寄聲

問

暑中不審旅食何似瞻企盛義無從請叩區區可知高  
文從容覽觀然未敢廣傳朝入甌暮徧天下矣何時再  
幸占款疲薊臨穎簡畧不宣

寒色伏惟尊履清勝眷聚無恙至節日阻陪樽下為壽  
私心惟切頌禱不肖職事粗爾乍到冗瑣疲薊殊不支仰  
思誨言馳情闕晚西來拳拳有道君子引企旦旦

不知其勞耳盛寒珍重時惠德音不宣

前日連獲手教并盛文二篇照黑索燭未及悅如在日  
園中矣既而研味高致非特奴僕命騷人不知三代以  
來作者尚可分路揚鑣與否神遊不遠竦然數日脾氣  
作憤憤如醉人無緣款曲承誨以悉別後牢結可知舟  
從定在何日行毒日跼伏不易處吾生不如意事十常  
七八每于左右眷眷尚覲新春冬去再尋杖履之適自  
餘不惜音驛交馳惟君勉強于我也千萬垂亮

近附遞脩記當浼左右兩日連捧賜教爛然禮意兼幅

不能盡畧其愚陋尋繹所貺浩乎若決天漢之瀦而渚  
之廣漠之野難堪眷遇重為愧戴伏惟養素里中德貺  
佳豫眷聚寧勝昔龐士元為南州士人之冠以世論之  
則兵戈之際與夫一道德同風俗蓋今日之盛也吾不  
知賢士大夫能相先高明以掠士元之美否區區願親  
之誠非尺書可道指日以俟言款

伏蒙不鄙孤陋過示盛文大編衍溢泫然雖前日蹈海  
未能若此文章久不到此惜乎先帝不與見也然神遊

不遠固當有享輒已傳錄願少寬假數日前日偶誦一  
二對于同舍中徵索者紛紛日不自給瓌傑偉麗聳動  
一至於此尤劇賞慕

春物已闌珊而寒色尚此偃薄不審比來起居何似茂  
惟神之聽之福祿攸居望門牆于數十里之外謁奉未  
涯仰冀順令倍萬綏將即日異擢謹上

五百家播芳大全文粹卷六十七